

左恪靖侯奏稿初編

恪靖奏稿初編卷十九目錄

錫封伯爵敬懇允收成命摺

奏報交卸赴閩督師勦賊摺

援閩軍餉由浙籌撥解應片

卸篆後敬陳浙江應辦善後事宜片

密陳記名提鎮切實考語摺

直陳李革司被參情節摺

覆陳被參鄧道巡禦不力請革職片

奏報督師行抵浦城見籌勦辦情形摺

請將丁憂臬司開缺幫辦軍務片

攻勦漳汀踞逆及見籌勦辦情形摺

查參畏賊玩法之將弁片

再陳懇辭伯爵摺

錫封伯爵敕懇允收成命摺

奏爲披瀝微誠敬懇

天恩允收成命俾得稍安愚分事竊臣於十月十八日
准兵部火票遞到同治三年十月十一日內閣奉

上諭聞浙總督兼署浙江巡撫左宗棠督師入浙恢復
浙東各郡縣進規浙西攻克杭州省城及湖州等府縣
肅清全浙並派兵截剿皖南竄賊盪平巨股卓著勳猷
茲當効逆洪福瑱就擒殲除餘孽東南軍務漸次底定
自應渥加懋賞左宗棠著加恩錫封一等伯爵欽此跪

誦之餘感激涕零罔知攸措伏念臣家世寒素耕讀相承數百年來並無貴仕微臣遭際

聖時仰蒙

文宗顯皇帝特達之知拔自草茅置之卿列自領偏師轉戰江西皖浙之間不數年疊蒙

皇上天恩洊擢疆圉重任寸功未建

異數頗加凡茲曠世未有之遭逢實屬夢寐難期之恩遇茲復以江西擒獲逆種更荷

鴻施錫封伯爵自顧何能濫叨

懋賞早夜慙懼莫知所爲伏念殄除盜賊慎固封守皆
疆臣職分當爲之事就使誅巢斬讓克奏膚功亦祇藉
手告成功於何有况論平浙一役溫處則得閩師之力
嘉湖則賴蘇軍之助卽幼逆就擒亦江西諸將士吏民
之力爲多臣幸藉助鄰封稍寬咎責豈宜濫糜好爵更
荷

褒封伏懇

皇上鴻慈允收成命俾微臣得稍安愚分益勵菲忱以
勉效馳驅無虞隕越則有生之日皆戴

德之年不勝悚息待

命之至謹陳悃懇伏乞

皇太后

皇上聖鑒施行謹

奏同治三年十月二十七日

議政王軍機大臣奏

旨另有旨欽此

奏報交卸赴閩督師勦賊招

奏爲後臣交卸撫篆起程赴閩督師勦賊所謂援閩各軍見在均可陸續馳抵閩境恭摺馳陳仰祈

聖鑒事竊臣於本月二十日准兵部遞到議政王軍機大臣字寄十月十三日奉

上諭左宗棠奏賊竄閩境請派兵援勦覽奏均悉龍巖與粵東毗連各處俱爲賊踞閩省軍情萬分喫緊著左宗棠催令派出各軍並親督官軍速籌進剿欽此旋得閩省稟報漳州仍爲賊踞李逆世賢踞漳州汀逆海洋

踞濯田丁逆三陽踞武平賊氛頗眾雲霄旣失漳平復
急閩中人心益形震動臣自雁迅速馳往相機勦辦所
調援閩各軍約分三路劉典率八千餘人由江西撫建
入汀州爲西路本月十四日已抵撫州前隊已行抵建
昌計此時已入閩邊矣記名臬司王德榜所部二千五
百人亦由此路繼進黃少春劉明珍率所部馬步四千
六百人由雋州江山出浦城爲中路臣原檄其趨邵武
續因汀州有備邵武無虞改調赴建甯以趨延平據報
十四日已抵浦城矣高連陞率所部四千並浙江補用

知府魏光邠所部五百人由杭州赴甯波僱坐輪船直趨福州出興泉爲東路據報上海輪船十九日可僱到二十二日全軍啟行計兩三日可抵福州臣於二十四日遵

旨將浙江巡撫關防兩浙鹽政印信

王命旗牌委臣標中軍參將李耀光杭州府知府薛時雨齎交藩司蔣益澧護理定於二十八日帶親兵及各營取道衢州浦城以出中路聞浙總糧臺仍駐衢州其浦城建甯均設轉運局一切進止機宜容當隨時馳奏

所有微臣交卸起程日期理合由驛馳
奏伏乞

皇上聖鑒訓示謹

奏同治三年十月二十七日

議政王軍機大臣奉

旨另有旨欽此

接閩軍餉由浙籌撥解應片

再浙省接閩各軍統計二萬三千餘人每月約需餉銀
十四萬兩此時漳州龍巖及汀州各屬均被賊擾閩省

軍需萬分支絀浙省派去援師所需餉項自應由浙協
濟且查從前慶端辦理援浙軍務半年用閩餉九十九
萬五千餘兩者齡辦理援浙軍務半年用閩餉九十九
萬八千餘兩臣接任後從上年四月起截至本年九月
止計一年零五個月又用閩餉一百零八萬二千兩茲
以浙餉仍濟浙師稍紓鄰國於義本爲允協臣赴閩後
應請

旨責成護撫臣蔣益澧署漕司楊昌濬每月籌撥餉銀
十四萬兩解交衢州總糧臺轉運軍前以資應用浙省

地方均係新復籌餉甚難見既奏明每月撥解援閩各
軍餉銀十四萬兩嗣後別省協款卽請
飭部暫免派撥理合附片具

奏伏乞

聖鑒施行謹

奏

同治三年十月二十七日

議政王軍機大臣奉

旨戶部速議具奏欽此

卸篆後敬陳浙江應辦善後事宜片

再浙江初復百度更新臣與僚屬竭力經營尙祇甫有
端緒如除匪安良剔除痼弊修復水利諸大端關繫尤
重臣智慮短淺又兼時日迫促未克稍究厥施實維心
疚如嘉湖槍匪一節爲奸盜之源風俗之害業經蔣益
澧節次拏辦斬除著名劇匪百餘名編立船埠稽查保
甲勒繳船械邇來浙境漸已斂戢風聞徒黨之投入上
游者尙多臣曾函請李鴻章密速捕治以淨根株未知
如何辦理蘇境未清則亦浙境之患也至台州負山面
海風氣素稱悍戾士豪動輒結黨相攻玩視官長及今

不治必爲後患臣已檄委留浙補用道銜知府劉璈署
理台州知府其台州協副將一缺則以留浙副將谷香
山署理各帶所部勇丁赴任冀以懲除豪惡俾愚懦得
以安生然亦非旦夕可期之效至杭屬及甯紹台溫濱
海之區海盜時有出沒水師直河虛設船礮全無欲治
洋盜以固海防必造礮船以資軍用輪船紅單兩式均
不可廢做造僱駕兩議非錢不行一時籌措無從不得
不緩期以待此治匪之事尙須妥爲經理者也杭嘉湖
三屬錢漕之重實浙中數百年民瘼攸關見雖擬議審

辦大槩情形陳

然非守令實心經畫難期盡善而垂久遠至南北新
開權稅之害關繫杭郡一方民瘼見甫議劃釐抵稅未
卜能否邀

恩其金衢嚴台四郡徵收錢糧章程尙未及籌辦此別
弊之事尙須妥爲經理者也浙江全轄土山近山者瘠
近水者腴民田賦重更賴蠶桑爲生理蠶桑之利惟浙
西爲最饒民之治桑其栽培灌溉與治水田無異故自
古治浙有聲者莫不以水利爲重也海塘關繫吳越兩

省農田寇亂以來石工坍卸過甚欲及時修復約略估計非百餘萬兩不可此時公私蕩盡捐墊俱窮臣前已奏明先辦上備塘暫禦鹹潮計亦非得銀二十萬兩不可其工槩由紳捐紳辦官不與聞見在雖經興工而亂後人稀料賤工貴一時尙難迅期蕙事至杭州西湖爲仁和海甯水利所關餘杭南湖爲仁錢水利所關省城中河爲民商炊汲舟楫之利今雖中河修濬完工南湖草草畢事而西湖則淤墊已高葑長水枯未遑議濬此修復之事尙須妥籌經理者也臣已交出撫篆料理起

程而每念此邦疾苦情形殊深耿耿幸護撫臣蔣益澧
與臣共事已久於整軍治民各事極意講求署布政使
楊昌濬與臣相處多年信心有素必能補臣缺漏仰答
恩知臣已將應辦未辦各事交其妥爲籌畫惟是爲治
之道興利不如除弊任法不如用人兩臣駁歷未久於
部中一切文法則例均未深悉若遽以此相繩正恐力
有未逮是則區區之愚不敢不盡者耳謹附片具
奏伏乞

皇上聖鑒謹

奏同治三年十月二十七日

議政王軍機大臣奏

旨另有旨欽此

議政王軍機大臣 字寄閩浙總督一等伯左宗棠同

治三年十一月初六日奉

上諭左宗棠奏交卸撫篆赴閩督師剿賊並添陳浙省
應辦善後事宜徐宗幹奏官軍分路剿賊情形並請辦
陣亡臬司張運蘭等優卹各摺片覽奏均悉竊建官軍
分路剿賊疊獲勝仗惟李世賢汪梅洋丁三陽等逆酋

踞漳州灌田武平等處賊數頗眾左宗棠見飭劉典王
德榜由西路進黃少春劉明珍由中路進高連陞等航
海直趨福州出興泉爲東路之師而自率親兵由衢州
浦城赴閩相機調度於地勢軍情籌畫均中窾要卽著
督率各軍迅速入閩實力剿賊盡殄賊氛以副委任其
閩省之曾玉明康國器等軍及江西赴援之宋國永龔
雲慶等軍仍著左宗棠徐宗幹分別檄催會合夾擊期
收聚殲之效至援閩軍餉業由左宗棠飭令蔣益澧楊
昌濟等每月籌解銀十四萬兩源源接濟卽著蔣益澧

督飭楊昌濬妥爲籌畫按月如數撥解以利軍行徐宗幹所請飭部酌撥鄰餉一節即可毋庸再議浙江初復百度維新左宗棠於除匪安良剔除痼弊修復水利諸大端竭慮殫心漸有端緒此時交卸起程蔣益澧護理撫篆卽屬責無旁貸所有海塘工程農田水利及濱海各郡整飭水師台州所屬懲除豪惡各事宜並著與楊昌濬審度時勢次第籌辦馬新貽到任後並著將以上應辦各事宜咨商左宗棠妥籌辦理務出萬全至嘉湖槍匪爲蘇浙兩省奸盜之源風俗之害經蔣益澧節次

擒斬劇匪編立船埠稽查保甲勒繳器械浙境漸已欽
戢而徒黨之投入上海者尙多著李鴻章督飭員弁密
迹捕治以淨根株不得敷衍了事致成隱憂左宗棠所
稱爲治之道興利不如去弊任法不如用人蔣益澧等
數歷未久請勿繩以文法等語部中文法皆係歷久奉
行舊章自當遵守至地方瘡痍未起一切章程有必應
變通者疆臣果能剴切敷陳朝廷未嘗不特予俞允蔣
益澧等惟當勤求民瘼力矢公忠遇有應行事宜將實
在情形詳晰具奏朝廷必能斟酌重輕權衡至當毋以

文法相繩鯁鯁過慮也將此出六百里諭知左宗棠李鴻章徐宗幹馬新貽並傳諭爾益體知之欽此

密陳記名提鎮切實考語摺

奏爲遵

旨將記名提鎮各員出具切實密考仰祈

聖鑒事竊臣欽奉

寄諭軍興以來各路軍營由兵勇出身打仗得力者應
保參副等官續有勞績無可再加往往奏請以提督總
兵記名簡放朝廷破格用人每逢各路統師疆臣奏保
無不立沛恩施惟提鎮係專開大員爲通省各營之表
率關繫極爲緊要嘗有戰勝攻取極爲得力而於平日

一切操防各事宜閱歷太淺未免失宜迨至臨經廢弛貽誤戎機被人參劾朝廷加以嚴譴致有用之才不獲養成大器以備干城之選殊爲可惜嗣後各省督撫各路統兵大臣凡保舉記名提督總兵者須另片密註堪以勝任字樣或其人才能堪造就而於提鎮大員尙難稱職不妨給予別項優獎俟其歷練較深再畀專閫重任如有實在不能勝任者亦卽隨時奏參不得稍有遷就以仰副整軍經武培植將材至意欽此跪聆之下敬懇我

皇大愛惜人才慎重器使至意臣維用人之方自古難
責人以備而行陣之選求全更難其人但使勇於赴敵
而驕恣不生廉於殖而軍民不困則制賊有其本而
已亂可止未亂者不工於亂也至於方略之優長機宜
之允協則求諸古昔口將蓋亦難之臣自親歷行間以
來留心考察於所部將領短長頗有所見謹據實密註
考語別具清單恭呈
御覽伏乞

皇上聖鑒謹

不系

奏同治三年十月二十七日

直隸李革司被參情節摺

奏爲遵

旨查明覆奏仰祈

聖鑒事竊臣於同治元年閏八月欽奉

寄諭有人奏已革臬司李元度罪重罰輕仍請按律定擬罪名一摺著左宗棠確切查明該革員罪重罰輕之處是否允當據實具奏原摺鈔給閱看 此本年八月二十九日准兵部火票遞到議政王軍機大臣字寄八月二十一日奉

上諭前因有人奏已革臬司李元度罪重罰輕仍請按
律定擬先後諭令左宗棠曾國藩確切查明據實具奏
茲據曾國藩奏稱李元度從該大臣最久艱苦備嘗咸
豐十年守衛之役到郡不及十日侍逆大股猝至兵力
未厚府城失陷奏參革職等因本屬從嚴十一年援浙
之役參案未結遽行回籍沿途飾報勝仗又不努力救
杭奏參革職留營尙爲允當且當六年春間江西糜爛
之時賴李元度力戰撫州支持危局該革員本有兼人
之才惟職陣非其所長用違其材遂至身名俱毀見在

大功組成追思昔年患難與共之人惟李元度獨抱向隅之感懇請酌量錄用等語李元度一員前因有人陳奏於同治元年閏八月閒寄諭左宗棠查奏並將原摺鈔給閱看此次曾國藩所奏各情仍著該督詳細查明李元度從前被參罪重罰輕之處是否允當迅速具奏欽此臣維曾國藩原參李元度一摺其情節以失守徽郡徑自募勇赴浙飾報克復義甯等城由江西援浙節節逗留以致杭城失陷四者爲重如原參徽郡失守一節臣查李元度自湖南平江募勇三千於咸豐十年八

卷一百一十一
月十六日甫抵徽州而李逆世翼已先四日攻陷甯國府城旋破叢山關李元度固守徽州府城三日力竭被陷曾國藩馳奏其時尚未知李元度下落也旋奉

文宗恩諭李元度謀勇兼優戰功屢著此次敗衄深爲可惜人才難得著該大臣迅速查明下落具奏十月初十日復奉

上諭皖南道李元度不能堅守待援著卽革職拏問臣查李元度失守徽州本有應得之咎曾國藩因其不能固守奏參革職拏問實爲允當惟其情尙有可原者以

三千之眾倉卒分駐徽山關徽州府城兩處數萬披猖之寇勢力懸絕以不能固守責之可也不知言者謂其棄城逃避並稱其逃走在徽城未失之先未經圍城一二日之險奏劾失實洵不足折服其心此曾國藩所以復有原參輩職等因本屬從嚴之奏也如原參不候審訊徑自募勇赴浙一節臣查李元度之募勇赴浙實由前浙江撫臣王有齡奏調曾奉

諭旨允行既非李元度營謀亦非鄧輔綸援引李元度每以曾國藩原參失實極口呼屈臣詢之鄧輔綸亦云

實無其事觀杭城未陷之先瑞昌王有齡屢次檄催李元度迅速馳援並飭浙紳胡光墉爲其籌措行程可知此議實出於王有齡非李元度之徑自募勇赴浙明矣曾國藩謂李元度由鄧輔綸干求入浙本是揣想之詞並無實據詢據鄧輔綸言身在浙江係候補道員望輕資淺軍謀一切大吏主之何敢妄有干預其言固可信也如原參由江西援浙節節逗留以致杭城失陷一節臣查李元度入浙時金華嚴州兩城已陷浙東徧地賊蹤龍游本是堅城李元度頓兵其下兩月不能速拔本

國舍龍游不攻急赴杭州之援無如前途堅城要隘均爲賊踞進兵之路早已斷絕欲進不能觀後此臣軍入浙先克遂安守之斷賊北路包抄乃引軍解衢州江山之圍進攻龍游湯溪蘭谿克金華肅清浙東然後攻富陽餘杭以攻杭州驍將勁兵歲事尚在兩年以後然則李元度當時孤軍未能深入人情固可原若以杭城失陷謂由李元度逗留所致未足折服其心曾國藩謂其不能努力救杭事外論人每多不諒未足據也至原參李元度自募勇赴浙飾報克復義甯等城一節查李逆秀

成由皖南江西徑竄湖北意在收羅黨夥以張逆餒逮
裹脅既眾復假道江西皖南以歸金陵李元度由平江
通城尾賊而來於賊去之後居復城之功實近無理臣
嘗以此詰李元度祇據稱曾見賊旗則其未嘗開仗可
知乃當時竟騰書報捷致湖北江西均據以入奏此罪
之可議者一也自臣軍解衛州之圍復轉戰江山斷賊
入江西福建之路時李元度固守江山分八營隨臣出
隊尙爲出力臣嘗倍加獎借以期共濟時艱並因欠餉
無從籌措應暫留數營緩撤俾餉項得資周轉乃李元

度自聞會國藩劾參落職後卽悻悻求去心煩意亂印
事紛呶維時臣軍除留守遼安外隨同出戰者僅五千
人而李逆世賢全股及粵賊譚星等花旗粵匪人數實
二十餘萬眾寡懸絕臣許其汰撤數營挑留數營隨同
勦賊李元度固執不從必求全撤且先將臣所指留各
營撤去以示絕無轉念明知其時浙境淪胥無從得餉
臣軍苦窘萬分乃日向倡索不給不休臣曾飭李元度
國家何負於爾乃竟忍出此耶李元度不顧也李元度
以一書生蒙

恩擢任皖南道轄境失守革職案問復蒙

恩擢至浙江臬司革職後奉

旨交臣差委當浙事危險之時心懷怫鬱不顧大局如此此罪之可議者二也至曾國藩初次奏劾李元度謂其預會國藩預王有齡此次代爲乞

恩又謂昔年患難與共之人惟李元度獨抱向隅之感所陳奏者臣係情義之私非

國家刑賞之公臣均不敢傳會具奏謹將李元度被參情節據實直陳伏乞

皇上飭部按律定擬以昭允當理合遵
旨附驛覆

奏伏祈

聖鑒訓示施行謹

奏同治三年十月二十七日

議政王軍機大臣奉

旨另有旨欽此

同治三年十一月初六日內閣奉

上諭前因御史劉慶奏參已革臬司李元度罪重罰輕

請仍按律定擬當經諭令曾國藩左宗棠查明具奏嗣據曾國藩奏稱前因徽州失守將李元度奏參革職等間本屬從嚴該革員前在江西力戰撫州支持危局本有兼人之才懇請酌量錄用復經諭令左宗棠查奏茲據左宗棠奏稱李元度固守徽州三日賊眾兵單力竭城陷原參謂其棄城逃避在徽城未失之先殊爲失實其募勇赴浙實係王有齡奏調並非不候審訊擅自回籍該革員援浙時浙東徧地賊蹤進兵之路中斷孤軍未能深入杭州失陷非由李元度逗留所致惟飾報克

復江西義甯等城一節查李元度由平江通城而來於賊去之後居復城之功未經開仗竟報捷書嗣後在山隨營剿賊輒因曾國藩參劾落職悻悻求去必欲將各營全撤偏索軍餉不顧大局則寶咎由自取等語李元度從前本有戰功被參各節亦多不實情有可原惟在江西飾報打仗復不顧大局撤勇索餉咎有應得著該部分別情罪秉公按律定擬以昭平允欽此

覆陳被參鄧道巡禦不力請革職片

再臣欽奉

寄諭有人奏浙江試用道鄧輔綸前在江西管帶平江營勇丁所至騷擾冒餉致富嗣捐道員分發到浙王有齡深加委任杭城失陷該員擁眾潛逃刻下聞尙在江楚鐵營帶勇希圖保舉等語該員於杭城失陷時本有應得之罪亟應從嚴懲辦以肅軍律著左宗棠查明據實參奏按律嚴懲毋稍徇縱原片著鈔給閱看欽此伏查鄧輔綸由同知捐升道員咸豐十年七月分發來浙十一年九月杭城被圍前撫臣王有齡委其隨同巡城及分查保甲等事十一月二十八日杭城失陷時鄧輔

綸在慶春門城上巡查而鳳山侯瀚等門守兵紛紛譁潰傳言清波堂江兩門已陷矣鄧輔綸正圖抵禦適賊眾蜂擁而來勢不能支鄧輔綸帶傷後投入城河遇難民搭救得生隨至上海同治元年三月隻身赴衢投到嗣因其祖母年逾九十請假省視臣當飭其回籍並無擁眾潛逃及在江楚鑽營帶勇情事該員到省僅只年餘資望甚淺王有齡僅委巡城及分查保甲等事並未深加委任至從前在江西帶勇所至騷擾冒餉致富一節訊查毫無實據該員係前江西臬司鄧仁堃之子人

頗馴謹家亦小康其帶勇時並無劣蹟至杭城被陷鄧
輔綸係試用人員自未便與地方印委各官一體治罪
惟巡禦不力咎亦難辭應請

旨將浙江試用道鄧輔綸卽行革職以示情法之平理
合附片具

奏伏乞

聖鑒訓示施行謹

奏同治三年十月二十七日

議政王軍機大臣奉

旨另有旨欽此

同治三年十一月初六日內閣奉

上諭前因升任御史梅啟照奏參浙江試用道鄧輔綸
前在江西管帶勇丁騷擾冒餉嗣捐道員分發到浙杭
城失陷擁眾潛逃復在江楚諸軍鎮營帶勇希圖保舉
等語當經諭令左宗棠查明具奏茲據左宗棠奏稱鄧
輔綸由同知捐升道員分發浙江咸豐十一年九月杭
城被圍經王有齡委令巡城迨十一月間杭州省城失
陷該員帶傷投入城河遇救得生於同治元年三月請

假回籍並無擁眾潛逃及在江楚鎮營帶勇情事其從
前在江西帶勇騷擾冒餉一節亦查無實據惟省城被
陷巡禦不力咎有難辭請旨革職等語浙江試用道鄧
輔綸著卽行革職欽此

奏報督師行抵浦城見籌剿辦情形摺

奏爲微臣督師入閩行抵浦城見籌剿辦情形恭摺
奏祈

聖鑒事竊臣於十月二十四日將兼署撫篆交卸後卽
於二十八日自杭起程十一月十六日行抵福建浦城
沿途疊據閩省文武稟報漳州龍巖南靖永定平和雲
霄各城賊尙屯踞如故署陸路提督林文察十月十二
日進剿漳郡踞逆副將惠壽營盤先陷林文察退紮玉
洲十四日出隊響水橋獲一小勝十一月初三日漳郡

踞逆出犯萬松關瑞香亭陸路各營並分股直撲鎮內
水營林文察督陸軍接仗因後路被賊抄襲兵勇敗潰
林文察中槍陣亡其瑞香亭萬松關陸營同時失陷方
事急時曾玉明督水軍橫縣賊陣死傷亦多旋退三汊
河並收集副將惠壽遊擊許忠標等潰勇暫駐江東橋
以固泉州門戶臣查閩省惟康國器一軍尙稱整練此
外各軍均係零星雜湊難期得力林文察前帶本籍臺
灣勇丁尙稱能戰此次內渡倉卒調集兵將兩不相習
復濫收隨營文武兵勇多人冗雜尤甚臣前檄令力保

泉原並未敢責以規復漳州旋聞其已進萬松關距漳城僅二十餘里復檄其深溝固壘勿浪戰求勝俟浙軍到後協力並規乃爲穩著不料其急於趨戰致有此失也幸高連陞一軍已由福州前進初七日已抵泉州據王稱逆賊李世賢自初三日得逞後土匪從亂如歸已蔓延萬松關石碼北溪等處泉廈岌岌林文察此次之挫土匪面擦煙煤潛襲後路即曾玉明亦稱土匪嫩官軍中隊即將營帳搶劫一空然則漳州民心之不足恃已可概見矣高連陞擬率所部急趨同安以保泉廈尙

未知能否到在賊前其記名提督黃少春及擬保總兵
劉明瑞所部臣木飭其暫住延平聽候調遣旋准撫臣
來咨已經調赴省旋調赴長泰據黃少春稟擬於初八
日前進比東路進兵情形也其龍巖州踞逆散佈長汀
連城甯洋各界時出窺伺候選道張恒祥率張運蘭舊
部一擊挫之見尙無動靜康國器由永安進紮雁石在
龍巖城東二十餘里臣咨劉典先將汀州連城甯洋一
帶踞匪肅清以攻龍巖之北復調新署福建臬司王德
榜由瑞金馳赴汀州擬俟其到後休息數日出汀州南

趨上杭以攻龍巖之西計驅逆賊歸併一處嚴遏北竄
彼此聯絡而後兵力乃敷分布免爲賊所牽綴見據劉
典國報已抵建甯縣其前隊已抵甯化王德榜一軍由
江西長甯取道寧都瑞金入閩計此時亦可馳抵汀界
此西路進兵情形也其中路以延平爲最要蓋延平踞
省會四百里一水可通旣也據上游以杜窺伺之萌復
可策應龍漳諸軍爲犄角之計臣原擬令黃少春暫住
此地待臣入閩後調還今旣調赴省城復調赴東路則
中路空虛臣已飭隨行四營先由建甯馳赴延平臣於

拜摺後卽率親兵續進俟抵延平後察看情形續報至
前奉

諭旨鮑超所部婁雲慶等由臣調遣此時尙無入閩消
息也除林文察失利陣二所部各營死傷潰逃實在情
形容會同福建撫臣徐宗幹查明分別請

卹參辦外理合恭摺由驛馳

奏伏乞

皇上聖鑒訓示施行謹

奏同治三年十一月十八日

議政王軍機大臣奉

旨另有旨欽此

請將丁憂臬司開缺幫辦軍務片

再臣於十一月初三日嚴州營次欽奉同治三年十月
二十三日

寄諭劉典見由左宗棠檄赴汀州勦賊軍務喫緊之時
未能遽准終養其浙江臬司本任卽毋庸先行開缺見
署臬篆之林聰彝如果閱歷尙淺於此缺不甚相宜卽
著左宗棠另派賢員接署或於鄰近省分另有所知人

才亦可酌保數員候旨簡用李榕見在院北帶兵一時
未能履任業准其開缺浙江運司已簡放楊昌濬所遺
浙江糧道一缺並令周開錫補授矣等因欽此臣查布
政使銜署浙江按察使劉典自上年開訃丁憂回籍卽
請開缺終制嗣以逆賊竄入江境臣檄其由湘募勇赴
江援剿旋奉

旨幫辦江皖軍務見在江境肅清閩省被賊竄擾臣檄
其由建昌取道汀連相機進剿該臬司以墨經從戎雖
義無可諉而服官從政終覺心有未安再四呈請開缺

俟閩省軍務完竣回籍終制臣察其情形極爲懇切是以不得不代爲陳請合無仰懇

天恩俯准開劉典署浙江按察使缺仍以二品頂戴幫辦福建軍務俾臣得收指臂之助至浙江臬司一缺臣於外省人才未能深知就浙江而論惟新授鹽運使楊昌濬廉慎勤懇才長品卓爲臣所深信實堪接署惟見以運司署理藩司未便再令兼權臬篆而運司一缺又非熟悉浙省鹽務情形者驟難期其經理咸宜楊昌濬署任政事殷繁勢難兼顧臣再四思維惟擬保道銜浙

江候補知府高卿培操履篤實才具明晰於籌餉諸事最肯盡心本年浙西改行票鹽章程臣令其悉心參酌皆能妥協若以之署理運司必能稱職亦浙江官場公論也茲承

垂詢謹據實附陳伏候

皇上聖鑒訓示施行謹

奏同治三年十一月十八日

議政王軍機大臣奉

旨另有旨欽此

議政王軍機大臣 字寄閩浙總督一等伯左宗棠兩
廣總督毛鴻賓江西巡撫沈葆楨福建巡撫徐宗幹署
廣東巡撫郭嵩燾同治三年十二月初一日奉

上諭左宗棠奏督師入閩行抵浦城見籌辦情形一
摺閩省漳州各城均爲賊踞署提督林文察倉猝進剿
致後路被賊抄襲兵勇敗潰林文察中槍陣亡賊勢披
猖泉厦危急高連陞一軍已抵泉州著左宗棠徐宗幹
飛檄該署提督迅率所部急趨同安務期到在賊前扼
要防剿以保泉厦門戶並飭調赴長泰之黃少春等軍

合力兜勦穩慎進攻毋令賊蹤再形滋蔓劉典前隊已抵甯化王德榜一軍由江西取道入閩計已馳抵汀界著卽照左宗棠所籌飛飭劉典所部先將汀州連城甯洋一帶踞匪肅清進攻龍巖之北王德榜所部由汀州南趨上杭進攻龍巖之西總期聯絡遇截妥籌分布將龍巖踞逆悉數聚殲以免旁竄左宗棠因其中路空虛先撥隨行四營馳赴延平卽率親兵續進著俟抵延平後居中策應分籌遏勦卽將辦理情形迅速奏聞漳龍一帶賊勢鴟張各軍分路環攻能將該處逆匪在閩境

就地聚殲自屬上策惟恐該匪被勦窮蹙鋌而走險則
回竄江西旁窺粵境或潛蹤入海以致滋蔓難圖均在
意計之中毛鴻賓郭嵩燾所派粵軍前已越境收復武
平等城著仍懷遵前旨迅飭方耀等軍跟蹤追勦會合
江西閩浙之軍進規漳郡殄除竄匪其閩粵濱海地方
並著左宗棠徐宗幹毛鴻賓郭嵩燾撥兵嚴防儻任令
匪蹤入海剽掠必惟該督等是問江西援閩之蜚雲慶
等軍見在行抵何處著沈葆楨迅催前進並由左宗棠
徐宗幹探明以厚兵力沈葆楨務當嚴飭江防諸軍嚴

扼要隘以杜匪蹤回竄圻稍疏忽左宗棠另片奏請將
署臬司開缺幫辦軍務等語本日已明降諭旨將劉典
開缺仍以二品頂戴幫辦福建軍務並將楊昌濬補授
浙江臬司高卿培補授浙江鹽運使矣閩浙諸軍勦匪
事宜卽著左宗棠隨時與劉典籌商辦理迅將逆氛掃
蕩疆圉肅清以副委任林文察陣亡詳細情形並著左
宗棠等查明具奏再降諭旨將此由六百里各諭令知
之欽此

攻剿漳汀畛迤及見籌勦辦情形摺

奏爲官軍逼攻龍巖扼守漳平疊獲勝仗暨山連城進
勦先勝後挫見籌勦辦情形恭摺馳

奏仰祈

聖鑒事竊臣宗室於十一月十六日馳抵浦城拜摺後
卽督師前進二十七日行抵延平據各路稟報李逆世
賢仍踞漳州江邊南洋踞長汀連城上杭三縣交界之
南陽鄉及新泉一帶自永定上杭龍巖以至漳州縱橫
數百里一片賊氛康國器由永安雁石進勦龍巖先飭

知府康熊飛率昭武彰武飛虎揭陽各營前進飭福建
水師遊擊陳允彩守備熊應烈分扼朝天嶺通明車之
路以杜逆賊抄襲十二月初二日康熊飛等進紮距龍
巖州城八里之鐵石洋賊乘營壘未就突出大股來犯
各軍力戰卻之初五日出隊距城三里地方擊斃逆賊
多名將城外賊巢焚燬初七日康熊飛羅洪彪林福喜
林本各率所部進薄東門賊伏不出相持至午突出悍
黨二千餘人自軍奮勇接戰斃賊數十名賊勢稍卻南
門北門又各出賊數千襲抄官軍之後林本率揭陽營

林福壽率飛虎軍馳往分擊槍斃賊匪無算三路之賊
皆敗退附城壘邊官軍正擬乘勢取壘適北門潛出悍
賊千餘由小路巡撲鐵石洋官軍營與彰武軍營官羅
洪彪督哨弁譚順龍許榮貴等竭力堵禦殺賊二十餘
名康熊飛等馳回夾擊應戰而時賊始敗退計是役共
斃騎馬賊目十餘名悍賊數百名是夜康熊飛林本激
勵各勇分路潛攻城外各賊壘破之又殺賊數百名十
一日龍巖各路援賊薈集分撲飛虎揭陽兩軍營壘官
軍憑壘以待康熊飛以緝洪彪彰武軍扼守蔣武小路

自率昭武軍往援持至未刻見賊勢將退康熊飛飭各營奮擊整騎馬賊目多名賊敗走十二十三等日龍巖城賊又出悍黨萬餘圍撲鐵石洋營畢往來猛攻十餘次均經官軍奮力擊退計兩日共斃賊千餘名十六日龍巖之賊又以大股突出東門另股由馬巖嶺僻徑竄入下老地方圍來攻鐵石洋營時康國器已馳抵雁石當飭各勇分伏山谷於雁石隘口虛設旗幟該逆恐雁石官軍截其歸路旋即退去當康熊飛等之逼攻龍巖也該逆見官軍深入喉逆首丁太洋由永定出漳平

以襲官軍後路漳平永福里土匪導由小路以撲城垣
朝天嶺守將陳允彩所部未築營壘遇大股賊至紛紛
潰散熊應烈勢孤且戰且退比至嶺腳收隊退保漳平
縣城十一日賊遂逼撲城垣適臣宗棠所調遊擊賴長
甫自甯洋馳至與熊應烈登陴固守偃旗息鼓誘之伏
壯士城外以待賊意其無備也蜂擁而至衝過浮橋城
上槍礮齊發立斃賊十餘名伏兵突起左右蹙之該
逆紛紛潰走落水及踐踏死者不計其數賴長熊應烈
見賊勢已挫復率勇開城出擊又殺賊百餘名該逆退

至距城二十里洪橋屯踞是夜賴長等挑勇丁數十名潛至洪橋將賊館焚燬羣賊驚擾達旦十二日仍向永福里朝天嶺退去此康國器一軍逼攻龍巖扼守漳平疊獲勝仗之實在情形也其劉典一軍由連城進駐朋口適接康國器函報漳州被圍請撥兵援勦劉典以汪逆海洋見踞南陽其黨分布舊縣新泉一帶若改趨漳平則連城清流甯化皆屬可虞當商撥護汀漳龍道趙均所部馳赴漳平自率各營進紮楊家坊以攻汪逆新泉南陽老巢使汪逆與龍巖踞逆首尾不能相顧冀勦

辨易於得手十七日分勦新泉下車上下羅等處賊卡
賊館破之殺賊六七百名生擒七十餘名十九日飭道
員李耀南副將張福齊參將劉大謨總兵楊芳桂馬步
各營分三路進勦馬洋洞將賊壘攻破正擬傳令收隊
築壘劉大謨等乃恃勇輕進甫行數里汪逆海洋賊各
路悍逆分路包抄各營面面受敵劉大謨及營官鍾九
如各受重傷副將盧華勝副將銜參將劉敬廷血戰陣
亡劉典急率總兵黃有功參將伍正得知縣陳鴻藻帶
隊馳援行甫半里卽與賊遇正接戰閒該逆另股已抄

襲後路遊擊郭立本力戰死之賊遂乘勢逕撲楊家坊
行營劉典與黃有功陳鴻藻折回援救而壘中已火起
矣同知李光榮知縣夏世楷州判姜景焜附生謝封擬
保訓導龍鴻賓從九品蕭子麒監生沈超文童黎斗城
等均守壘遇害其道員李耀南副將張福齊由小路口
進者亦被賊圍逼督所部奮擊突圍而出損失獨少二
十日劉典收集各營退保連城此劉典一軍由連城進
剿先勝後挫之實在情形也竊維汪逆因康國器一軍
速逼龍巖希圖圍攻漳平以抄官軍後路劉典抵連城

後操先攻南陽汪逆老巢原欲攻所必救以分賊勢而
解漳平之圍布置本屬周妥因山徑分歧客軍初至未
及審眎戰地劉大謨違令輕進遂致爲賊所乘見王德
榜王開琳兩軍計期可抵汀州漳平擊賊解圍鐵石洋
各營以固守徂賊賴長熊應烈已經康國器調赴雁石
護汀漳龍道趙均巳率所部嚴扼漳平北路兵力漸厚
臣飭劉典固守連城所部李耀南張福齊兩軍銳氣未
減可與王德榜王開琳兩軍聯絡共圖汪逆必將汪逆
巨股掃除然後可合圖龍巖也其高連陞一軍抵泉州

初編卷十九

三

後聞同安土匪將乘機蠢動圖應漳城踞逆高連陞急馳而前初十日抵同安人心乃定見已由同安進紮距漳城二十餘里之萬松關瑞香亭一帶扼漳州東路黃少春一軍亦飭由泉州同安赴長泰進扼漳州東北一路賊固匿不出將以堅城綴我伺閒以逞也漳州城外數十里地勢平衍彌望蔗田難以進攻自林文察敗歿後附近村莊多被賊脅必先將村莊撫定乃免內患見檄高連陞黃少春勿攻城勿浪戰深溝固壘相機圖之能誘賊撲壘反客爲主痛剿數次然後機有可乘長泰

一路與漳平連界能就近聯絡庶可防紛竄而衛泉廈
紓漳軍後顧之憂臣等會商辦賊之法必須取遠勢漸
逼漸進驅各處股匪歸併一處而後合力蹙之庶完善
之區得以保全而兵力亦敷分布未敢急目前之效致
誤大局也署浙江按察使劉典此次先勝後挫自請議
處咎有應得惟念該員因救援漳平龍巖官軍冒險急
進情有可原應懇

天恩免其置議以觀後效副將銜參將劉大謨管帶右
路各營違令輕進致有貽誤雖曾受重傷究難辭咎福

建金門水師遊擊陳允彩經康國器飭令嚴扼朝天嶺
遇賊卽潰實屬庸懦無能均應請

行革職拏問聞浙儘先補用副將盧華勝副將銜浙江
儘先補用參將劉敬廷遊擊郭立本卽選同知李光瑩
候選知縣夏世楷儘先選用州判姜景焜附生謝封擬
保訓導附生龍鴻賓卽選從九品蕭子麒監生沈超文
童黎斗城均請

旨飭部照陣亡例議卹擬保副將銜參將花翎遊擊賴
長力守漳平擊退巨股逆匪當危險之際從容鎮定膽

力兼優應請

旨賞給勇號以示優異理合恭摺由驛馳

奏伏乞

皇上聖鑒訓示施行再此摺係臣宗棠主稿合併陳明
謹

奏同治三年十二月初五日

議政王軍機大臣奉

旨另有旨欽此

議政王軍機大臣 字寄閩浙總督一等伯左宗棠同

治三年十二月二十一日內閣奉

上諭左宗棠等奏官軍進攻龍巖扼守漳平迭獲勝仗
暨由連城進剿先勝後挫情形一摺粵逆擾竄福建自
永定上杭龍巖以至漳州賊氛縱橫數百里經左宗棠
調派康國器一軍進剿龍巖擊斃賊匪多名焚其城外
賊壘該逆由東南北三門分路出撲並迭次出悍賊萬
餘圍撲官軍鐵石洋營壘均經擊退連日共斃賊千餘
名該逆因官軍深入勢另股分擾漳平圍襲後路朝天
嶺守將陳允彩敗潰熊應烈退漳城適遊擊賴長率軍

馳至與熊應烈登陴固守伏兵誘之該逆將擁而至衝
過浮橋城上槍礮齊發左右伏兵突起逆匪紛紛敗潰
落水及踐死者不計其數乘勝逐北並將該匪洪橋賊
館焚燬賊向朝天嶺退去劉典一軍由連城進攻汪逆
新橋南陽老巢連破下車上下羅馬洋洞賊卡賊壘參
將劉大謨恃勇輕進被賊包抄劉典急率隊馳援復被
另股抄襲後路副將盧華勝等先後力戰陣亡仍著左
宗棠徐宗幹部勒諸軍迅將汪逆巨股殄除次第克復
龍巖漳州等城毋任久踞此次劉典進兵先勝後挫必

有應得惟該員因救援漳平龍巖官軍冒險急進情有可原著加恩免其置議參將劉大謨違令輕進致有貽誤實難辭咎福建金門水師遊擊陳允彩扼守朝天嶺遇賊卽潰庸懦無能均著卽行革職擊問閩浙儘先補用副將盧華勝副將銜浙江儘先補用參將劉敬廷遊擊郭立本卽選同知李光瑩候選知縣夏世楷儘先選用州判姜景焜生員謝封擬保訓導龍鴻賓卽選從九品蕭子麟監生沈超文章黎斗城均著交部照陣亡例議卹以慰忠魂參將賴長此次力守漳平擊退巨股逆

匪實屬膽力兼優著賞給著勇巴圖魯名號以示鼓勵
欽此

議政王軍機大臣 字寄福州將軍英桂閩浙總督一
等伯左宗棠兩廣總督毛鴻賓江蘇巡撫一等伯李鴻
章福建巡撫徐宗幹署廣東巡撫郭嵩燾廣西提督馮
子材同治三年十二月二十一日奉

上諭左宗棠等奏官軍偪攻龍巖扼守漳平獲勝暨由
連城進剿先勝後挫見籌辦情形毛鴻賓等奏越境
赴援詔安乘勝進偪雲霄見仍防剿兼籌並請調馮子

材督辦東江軍務吳全美請假回籍各摺片覽奏均悉
本日已明降諭旨照左宗棠等所請分列獎懲矣逆首
李世賢仍踞漳州汪海洋踞長汀連城上杭交界之南
陽鄉劉典一軍新挫逆勢披猖該督所籌辦賊之法先
取遠勢漸逼漸近驅令歸併一處然後合力蹙之實爲
切中機宜見在王開琳王德榜兩軍計可抵汀賴長等
軍經康國器調赴雁石趙均所部亦已嚴扼漳平北路
兵力較厚著左宗棠徐宗幹妥籌布置務期聯絡聲勢
先將汪逆巨股殄除以期進逼龍巖劉典退保連城之

軍尤當穩慎進取勿再疏失漳州城外地勢平衍自林
文察敗歿後附近村莊多爲賊脅高連陞一軍見紮萬
松關瑞香亭一帶以扼漳州東路黃少春一軍馳赴長
泰扼漳州東北一路該逆堅匿不出伺隙圖逞乃其慣
技左宗棠務令各軍深溝固壘先爲不可勝以待賊之
可勝其漳軍後路及泉廈門戶須節節布置嚴密毋致
爲賊所乘閩省賊勢甚重該處兵力恐有不敷江南見
已無警著李鴻章於蘇省防兵內酌量抽撥破隊赴閩
歸左宗棠調遣李鴻章所部除劉銘傳一軍已赴豫省

外此外該省得力兵將左宗棠如須添調一面檄調一面奏聞以資協助毛鴻賓等奏官軍赴援詔安乘勝進逼雲霄惟龍連汀杭一帶界連潮州不能不防其間竄該督撫見飭李福泰往來嘉應惠州之間相機調度方耀一軍由武平進紮上杭之蚡蛇渡先願上杭進規永定鄭紹忠一軍駐紮上杭之峯市與翟國彥方耀等聯絡策應所籌尙公賊謀甚狡伺隙卽逞著卽飭令李福泰督飭諸軍相機會合進勦務先嚴防本境門戶毋得少有疏虞賊如不得逞志於閩必將全力趨粵馮子材

前經請假回籍修墓曾令其假滿後赴廣西提督本任
該員久歷戎行深明韜畧廣東形勢岌岌自應保衛桑
梓馮子材著暫留廣東督辦東江軍務並毋庸俟假滿
卽馳赴大埔饒平之交擇要駐紮堵剿漳州大股巨逆
李福泰俟馮子材到防後再行回省吳全美統帶師船
回粵著賞假三箇月回籍修墓福建軍務緊要著毛鴻
賓傳知該提督假滿後卽馳赴福建水師提督新任毋
庸來京陛見毛鴻賓等片內所稱據總稅務司赫德面
稱適見新聞紙言侍逆李世賢見踞漳州勾結洋人幫

同襲取泉州進襲福州約將海口通商地面讓給洋人等語原不足據以爲信而各處流氓鬼子希圖勾結網利亦事所或有請飭福建防範並飭總理衙門照會各國駐京公使轉飭駐紮閩省洋官及領事官等約束商民各等情本日已諭令總理各國事務王大臣妥籌辦理著英桂徐宗幹嚴飭所屬妥爲稽查如有外國流氓勾結生事拏交各國領事官從嚴懲辦泉州等處防務並著飭令地方文武認真辦理勿稍大意毛鴻賓郭貴方另片奏香山富民陳守善徐瓜林二戶皆以依附洋

人致富始而避居澳門繼則避居天津此輩挾貲既富
聲氣易過謠言之興未始不由於此見飭查拏究罰等
語捐務之興原係朝廷不得已之舉必須準情酌理多
方勸諭方可以免怨尤若派捐勒捐自不免人言藉藉
該督撫以此次謠言之起謂苛派擾民逼迫各富戶遷
徙澳門香港查訪不得主名疑爲陳守善等所爲欲行
拏辦該富戶等坐擁厚貲一味慳吝雖屬可惡然朝廷
有寬大之體遽加以造言之罪查拏嚴懲恐弭謗實以
興謠該督撫務須斟酌妥籌未可任意孤行致失人心

將此由六百里各諭令知之欽此

查參畏賊玩法之將弁片

再漳州之失變起倉卒鎮道同時殉難城守都司汪普
恭未能救援續入之女察營內亦未出力林女察十月
十二日十一月初三日兩挫已革副將惠壽及參將顧
飛熊遊擊許忠標賴正修守備可如龍等身爲營官或
遇賊先潰或不力圖援救以致獲軍陷沒該將等畏賊
玩法均堪痛恨除咨高連陞黃少春等確查當日情形
及此外應行查辦各弁據實覆知分別擬辦外應請先

將汪普恭惠壽許忠標賴正修許如龍均革職等因以
肅軍令謹附片請

旨伏乞

聖鑒訓示施行謹

奏同治三年十二月初五日

議政王軍機大臣奉

旨汪普恭等均著革職等因按律懲辦欽此

再陳懇辭伯爵摺

奏爲

聖恩愈厚臣志難安仍懇

允收成命事竊臣於十一月十八日浦城行營准兵部
火票遞同原摺派准議政王軍機大臣字寄同治三年
十一月初六日内閣奉

上諭前因左宗棠督師恢復浙東郡縣規復浙西並攻
克杭州省城肅清全浙派兵援剿皖南江西掃除餘孽
特沛殊恩將左宗棠錫封一等伯爵以示優異茲據左

宗棠奏懇陳下悃懇請收回成命並推功於諸將士各等語所奏意存退讓具見悃誠惟朝廷功懋懋賞原以該督抵浙以後削平巨寇肅清浙江全境厥功甚偉豈能無破格恩施以獎勞勩至溫處嘉湖用兵雖得閩師蘇軍之助總由該督調度有方剋期底定洪福瑱竄擾江西亦由該督派兵援剿方能迅速肅事左宗棠實爲有功國家之臣錫爵酬庸洵可當之無愧所請懇辭伯爵之處著無庸議欽此跪聆之下悚仄益深伏念軍興以來在事諸臣宣勞最久暨効力最遲諸臣多由薦舉

得官留於疑謗交集之時蒙

文宗顯皇帝特旨垂詢而起其受

兩朝恩知之隆愈深其圖報之心應愈切頻年馳驅戎
馬皆分所當爲旣疊蒙

殊恩畀以疆圻重任復承

溫旨異數頻叨在

朝廷已極懋賞之施在臣應知止足之分若再濫膺顯
爵愧歉奚如此臣之所難安者一也逆賊李世賢在滬
洋巨股竄入閩粵爲縣數被襲陷臣兼圻責重未能先

事豫防茲當督師進征亦惟以忠義共相勛勉庶期殲
羣醜以播

天威拯邊氓而固封守若先有責竊之譏更難責諸將
士以用命之效此臣志所難安者二也凡茲陳懇實出
愚誠不敢飾讓以鳴高亦不敢矯情以速謗應勿懇

皇上天恩允收成命俾得稍循涯分勉副馳驅不勝
悚息待

命之至伏乞

聖鑒施行謹

光緒三年十二月初五日

議政王軍機大臣奉

旨知道了毋須固辭欽此